



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ,  
Orthodoxorum Medicorum Patrono.

QUESTIO MEDICA,

CARDINALITIIS DISPUTATIONIBUS  
*manè discutienda, in Scholis Medicorum, die Jovis vigesima-octava  
mensis Februarii, Anno Domini M. DCC. LXV.*

M. JOANNE-BAPTISTA BASSEVILLE,  
Doctore Medico, Præside.



*An quæ viris, eadem mulieribus conveniunt corporis & animi exercitia?*

I.



MULIER divinitatis opus, humanitatis honos iisdem  
è principiis conflata quibus & mas, eodem quoque  
partu edita quondam, fuit æquè particeps ac ille cor-  
poris affectionum, nec animi dotibus ab eo degener.  
Inde vir feminâ non potior alter ab alterâ; quid in  
corde, quid in cerebro discrepat? In utroque nonne lien, hepar,  
pulmo, renes planè consimiles, frontis eadem dignitas, ossium  
cartilaginum par numerus? Vasorum propagines an aliis virile  
corpus, aliis muliebre succis alluunt? Hujus & illius animata  
compages an diversis movetur musculis? Numquid & ambobus &  
necessaria victûs & medicinæ communitas, æquale vitæ stadium,  
mutuos ad amplexus æmula propensio? Nec minùs utile quàm  
dulce connubium pulchrâ dum sobole facit utrumque parentem:

hæc grata nuptiarum messis est quam partitur cum conjugæ conjux. Sic patrum in natos divisum est cum matribus imperium. Inter se tam bene si conveniunt utriusque sexûs homines, an illa quæ viro concedis exercitia corporis & animi, mulieri denegabis?

## I I.

**M**OTUS expers nulla corporis exercitatio. Hæc, ut ille, viris est familiaris ac mulieribus, natis coarva veluti nascituris. Nonne fœtus, sive mas sive femina, simile ponit exercitationis tirocinium, dum conclusus in uteri latebris æquo pulsat pede viscera parentis, nec impari calcitratu suum rumpit carcerem lucis usurâ fruiturus? Annon & in cunis sua peculiaris est infantulis exercitatio quæ cadit in utrumque sexum? Quin & puellulæ, quæ factæ sunt atatulâ paulo provectiores, æqualibus cum pueris mille modis exercentur, choreis indulgent, saltationi, pilæ volatili concentibus, ambulationi. Annis post modum accedentibus, quot teneræ virgines, quot nuptæ mulieres, dum sui juris sunt, equitant sessione masculâ, venantur, natant, piscantur; sunt quæ sub dio versantur inter armatos sexum mentitæ, quæ viris ipsis martios affundunt animos, quæ cum viris terram colunt, arant, fodiunt, quæ ferunt arbôres, metunt segètes, maritant vitibus ulmos. Gemunt aliæ sarcinarum sub pondere, sudant, algent, aliæ pernoctant humi, totâ die pedites eunt redeuntque vias quàm longissimas. Tot exercitationum labores ferunt & utero gerentes, mox daturæ progeniem valentissimam. Desinant igitur urbanæ mulieres exercitia præ graviditate recusare, fugiant mollioris & umbratilis vitæ delicias fœtui simul & fœtu mala multa parituras. Nec aliunde fortassis est quod prægnantes olim matronæ suis stipatæ conjugibus dicata Junoni Lucinæ templa pedibus adire jubebantur. Numquid ut religionis sic exercitationis ergo, sancita lex ista fuerat?

## I I I.

**Q**UOD ars Medica mulieribus imperat, docet idem natura belluas. Earum femellæ gravidæ licet & ad pariendum vicinæ, nonne suos hic & illic errantes comitantur mares, Oves gradiendo, Cervæ pascendo deponunt fœtus absque molestiâ? Sua pisces agitanda profluenti tradunt ova; sua quoque versant identidem vel incubantes oviparæ. Quid quod aves cum maribus plurimæ summis nidificant in arboribus, ut in nido, velut in pensili lecto, pulsata flatibus ova venti motum sequantur; adeo verum est animal omne motu generari, motu conservari. Hinc in hominum genere quisquis ad exercitationes erit impiger, erit &

ille sanitatis integer morbike purus. Et quidem, labore si dissipantur humores qui superfluunt in corpore, humorum redundantia si mulierem magis quam virum putas obnoxiam, feminis idem laboriosiora quam maribus, aut aequalia saltem praescribes exercitia. Ea sanè de causâ quot infirmos homines utriusque sexûs invenias & in tenui panno, & in purpurâ decumbentes, qui feliciter uno eodemque tempore convalescunt, dum languida similibus committunt exercitationibus corpora? Quoties viris ac mulieribus in ultimas quondam terras simul exportatis utile fuit exilium secundæ valetudinis recuperatione, quam siccatis antè à bene multis pharmacorum calicibus assequi non potuerant.

## I V.

**U**T corpori sic animo sua sunt exercitia. Agitationes animi quis non sentit in exercitationibus ingenii, quis variis in affectibus, quis in cogitationibus non deprehendit? Hæ sunt exercitationes animi, hæc curricula mentis æquè nota viris ac mulieribus. Reverà si sexu carent animæ, si nec origine, nec agendi ratione dispares, cur in mare, cur in feminâ diversis illæ motibus cierentur? Vis illa mirabilis quâ diriguntur in utero molis humanæ primordia, cur in utroque sexu similes ad informandos fœtus ingenii non aptaret cerebri loca quæ frequentat animus? An alius in viro, alius in muliere typus hominis? Uterque nonne conditus ad Creatoris imaginem, nonne rationis compos & intelligentiæ? Proinde politicarum rerum sicut & artium liberalium cognitio feminis non minor quam viris, quasi patrimonii loco, relicta est. Eas si plerumque lex removet à publicis & civilibus officiis, an quia legis auctores sunt viri, qui regiminis & imperii sui socias mulieres non ferunt, non patiuntur haud ignari; quid ubique femina possit? Nimirum cum semel est admissa mulier in optimatum conciliis, omnium sæpè voluntates & studia rapit ad se necessitate quâdam amabiliter imperiosâ, persuadet si proponit, impetrat si petit. Demùm quid hominum mentes acuit & exercet solertiùs, quid edaces eorum curas fallit ingeniosius, quam cordatæ mulieris blanda colloquio? Si quos pietate graves, si austerè ac religiosè degentes viros hodiè suspicimus, veneramus, quam frequens adhuc est chorus virginum in eodem sanctitatis curriculo unâ defudantium quas laudare facilius est quam imitari. Annon & suis gloriatur hæc ætas mulieribus quas ut viros exposivit urbanitas, ingenii perspicacitas erexit, prudentiæ maturitas informavit? Nec defunt qui Picturam profitentur, Poësim calient, Historiam tractant, Mathesim, Philosophiam. Extant &

feminae principes quæ mari, terrâ, domi, militia, populos sapienti regunt imperio; quæ gentium, quæ Regum lites ac jurgia componunt. Ecquis posthac non intelligit mulieres sapienter cogitare, cogitata utiliter exequi? Quis utrique sexui datos à Deo similes non agnoscit igniculos, quibus vir & mulier ad summa quæque certatim evehuntur, quoties ambobus eadem licuit exercere studia disciplinarum?

## V.

**S**i feminei corporis teneritatem objicis, si sustinendis virorum exercitationibus parem negas, complures diversi sexûs homines paululùm circumspice, delicatulos totidem numerabis viros quot & feminas; utrosque tamen observabis ad exercitia passibus æquis & animosè concurrere, si teneris ab annis ignaviam fugerint iisdem paulatim assuefacti laboribus. Sic molle puellarum corpus ordinata firmat exercitatio. Imò, robustum, licet natura virum finxerit, is tamen suas brevi sentit vires languescere, nisi frequenter exerceatur. An quoniam velut exercitatio citius amandantur è corpore viles alimentorum reliquiæ, similiter inertiam recinentur sanguinis & spirituum comœatui moram allaturæ, undè corporis & animi stupor otiosorum hominum commune stipendium: cur non paucas affligat feminas hæc invaletudo, haud aliam suspicari causam licet nisi desidiosum vitæ genus, ad quod illæ sæpius à viris se damnatas esse conqueruntur, an jure vel injuriâ pronunciet qui noverit utriusque sexûs æqualitatem? Non itaque nata mulier ut in umbrâ parietum domesticæ tantùm curet negotia, non facta conjux ut in solis hæreat mariti complexibus, sed ut etiam cum viro cætera corporis & animi dividat exercitia, quibus illum non imparem docet ratio, confirmat experientia.

*Ergò quæ viris, eadem mulieribus conveniunt corporis & animi exercitia.*

Proponebat Parisiis CAROLUS-NICOLAUS D'ESLON,  
Tullensis, Doctör Pontimuffanus, Serenissimi Principis Comitis  
regnantis Limburgii Consiliarius Medicus, necnon Saluber-  
rimæ Facultatis Medicinæ Parisiensis Baccalaureus, A. R. S. H.  
1765. A SEXTA AD MERIDIEM.